

## ■ TRIBUNA POLITICA

# Ina buna nova!

DA CUSSEGLIERA GUVERNATIVA  
BARBARA JANOM STEINER\*

La regenza ha deliberà la missiva davart la refurma da la gulivaziun da finanzas per mauns dal cussegl grond. Er questa refurma è ina pitga impurtanta per rinforzar las vischnancas. Ella procura per ina gulivaziun da finanzas gista ed effizienta tranter las vischnancas. Ella eliminescha duplicitads e distgargia il chantun e las vischnancas d'ina burocrazia nunnecessaria.

Las mancanzas da l'actuala gulivaziun intrachantunala da finanzas èn enconuschentas e renconuschidas. Quella datescha en sias parts fundamentalas dals onns 1958 e na satisfa insumma betg pli a las pretendiuns actualas. Ella impedischa adina pli fitg il svilup en differents secturs. Cun ina refurma cumplexiva duai vegnir introducida ina gulivaziun completamain nova che resguarda d'ina vart las resursas e da l'autra vart però er las grevazzas d'ina vischnanca. La finanziaziun da las incumbensas dal chantun e da las vischnancas vegn simplifigada. Il chantun surpiglia per exempel da nov tut ils custs per sanar abitaziuns en il territori da muntogna,



per cusseglar mammas e babs, da las scolas professiunalas spezializadas u per sanar las cuvridas da las vias chantunalas entaifer ils vitgs. Las vischnancas da lur vart finanziachan da nov exclusivamain per exempel l'agid social persunal, ils stabiliments per aua persa e per dismetter ruments u ils indrizs per pedunas e peduns.

Las vischnancas vegnan distgargiadas tut en tut per circa 15 milliuns francs per onn. La gronda part da las 146 vischnancas po profitar d'ina distgargia. Tschertas grevazzas supplementaras resultan per regla per las vischnancas cun bleras resursas. Il project da la regenza è ussa però concepì uschia che la refurma è supportabla bain er per vischnancas fermas, en spezial per las vischnancas turisticas. Vischnancas cun bleras fracziuns e cun blers

abitadis sparpagliads pon ultra da quai profitar pir cun dretg. Ma er in bun sistem da gulivaziun na po betg far or da tut las vischnancas retschavidras da contribuziuns.

Jau sun persuadida ch'ils avantatgs da la refurma sa mussan ussa cleramain. La nova gulivaziun da finanzas è gista e transparenta. Ella rinforza la capacitat da prestaziun da las vischnancas e la solidaritad entaifer il chantun. Ella procura per in'applicaziun effizienta dals meds finanziaziunals publicis e sustegna la refurma currenta da las vischnancas e dal territori. Uschia gida ella a dumagnar las sfidas futuras.

Il cussegl grond vegn a tractar la missiva en la sessiun da december 2013. La realisaziun da la refurma è prevista per il cumenzament da l'onn 2015. Nus ans engaschain cun blera energia per ch'ella possa vegnir realisada senza retard.

Jau aud bain la nova»; jau crai er – cuntrari al Faust – ch'ella vegn a vegnir chapida questa giada!

**Cussegliera guvernativa Barbara Janom Steiner è cheffa dal departament da finanzas e vischnancas dal Grischun.**